

Vun driveriver

erscheint auf www.lenauheim.de

monatliche
Erscheinung

November 2012

von *Helen Alba*

Schepperts oder schepperts nit?

Wann mer Rentner is, teelt mer sich de Tach so in, wie des am beschte passe tut. So ach bei der Bäsli Greti un em Vetter Joschka. Iwerhauptscht jetz, wann die Nacht lang is, schlofe se, bis se wackrich gin, dann luntze se noch un horche Musich, bis es Tach werd. Am e scheene Morjet awer rappelt ufmol de Wecker. Drauss war noch dunkl un erscht ment die Bäsli Greti, ihre Mann hätt aus Versehen beim Uhrfziede de Wecker ingstellt. Doch wie se gsieht, dass der um halbnacht ufsteht un Frühstück han will, krummelt se: „Was is los? Gischer Owet war ke Red vun friehe Ufstehn un jetz ufmol haschts Randl? Wu willscht dann um so e Uhrzeit hinlaafe?“ „Red nit so vill, ich geh ins Gschäft!“ „In welles Gschäft dann? Mir misse heit nix inkaafe!“ „Heit git e neijes Profi-Gschäft ufgemacht un ich will schau!“ „Bischt teppert? Dorte schlaan se sich sicher die Kepp naner in. Un du willscht doch nor gaffe gehn! Es reent. Lee dich zruck ufs Ohr!“ „Des han ich mer vorgohol, ich geh un basta! Ich sin gspannt, obs scheppre werd, also ob se die Scheiwe inschlaan oder manierlich sin, die Leit.“

Also hat die Bäsli Greti em des Esse gericht un adje, fort war er. Wie de Vetter Joschka noh zwaa Stunde wieder zruck war, verzählt er: „Schwowe ware sogar an der Spitz. Die misse sich schun in der Nacht angstellt han. Un es ware so an die 200 Mensche versammelt. Sie han schun gstriet, wie ich hinkumm un es Gschäft noch gar nit uf war. Weil se nit alli Inkaafswägelcher ghat han. Die Miliz war a zur Stell un hat zu schlichte versucht. Doch wie die Tier um punkt acht Uhr ufgemacht gin is, han die Leit ufs gudi Benehme vergesst, han gschupst, gedrängt, gstosst... Doch gscheppert hats nit. Ich han noch gewart, bis die Bäsli Mari, die wu als erschi nin is, rauskumm is. Die han ich dann gfroot, ob des sich gelohnt hat, ob was im Angebot war. Sie war awer nit sunder begeischtert un hat behaupt, anri Gschäfte wäre do nit so geizich gewenn!“

Die Lampn ausgebrennt

De Vetter Jerch war schun immer e Dickkopp eener. Sei Bäsli Klari hat johrelang versucht, em de auszutreiwe, was ihr awer nit gelung is. Sie is Tach un Nacht uf alles gfasst. Un wuppsdich, noch gar nit so lang war mol wieder Tollwei. Im Schlofzimmer steht uf jedem Nachtkäschtl e Lampn. Wie de Vetter Jerch ufsteht hat misse, will er die aus Gewohnheit anbrenne, doch ke Licht geht an. Er hat vorsichtshalber immer newerm Bett e Batrielicht stehn, greift noh dem, geht ins Bad un wie er zruckkummt, brennt er es grossi Licht an un fangt zu wurschtle an. Die Bäsli Klari, ausm Schlof geriss, will anfang zu rede, doch denkt se, dass des nix bringt un is erscht mol ruhich.

Doch de Vetter Jerch rumoort do rum, sie kann sich nimi es Rede verbeisse: „Lee dich endlich wieder ins Bett, mir schau morje bei Tach, for was des Nachtlitc nimmi brennt. For schlofe brauchscht doch ke Licht!“ Nix, de Vetter Jerch geht un holt es Nachtlitc vun seim Weib seim Nachtkäschtl, des brennt. Jetz fangt er an seim Licht zu schrauwe an, bis de Schirm runer gemacht war, schraubt die Lampn raus – sie war ausgebrennt. Also nix me zu mache, wie am anre Tach ins Gschäft gehn, e neiji Lampn zu kaafe.

Doch weil er de Stecher aus der Dosn gezoos hat ghat, hat sich die elektronisch Uhr newerm Bett verrickt un war uf Null gstann. Die Bäsli Klari wettet: „Wann nit bal Ruh is, geh ich ins Wohnzimmer schlofe. Muscht dann sogar mitte in der Nacht die Dickschädl dorchsetze?“ Doch de Jerch war nit aus der Ruh zu bringe. Er tuppt an dere Uhr rum un weil er nit gewisst han, wie mer die instelle muss, hat er anfang in de Schublade zu suche. „Was is jetz? Du kannscht doch horche, wann die Wanduhr schlaat un weescht dann wievill Uhr is. Was suchscht eigentlich?“ „Es Handbuch vun dere Uhr. Ich muss nohlese, wie mer die instellt!“

Wie er die Uhr dann endlich gericht ghat hat, war fünf Uhr morjets. Er hat sich ins Bett geleet un is momentan ingschloft. For die Bäsli Klari awer war die Nacht am End. Sie hat im Bett gelee un gewart, dass es Tach gin soll!